

— Չէին ուզում՝ պնդեցի:

— Դուք չփոթում էք մտայնութիւնը ոգու հետ: Բոլորովին տարբեր վիճակներ են: Բառերից էլ պէտք չէ խարուել: Ամէն մի բառ պարունակում է իր մէջ, կամ աւելի շուտ իր շուրջը, ամբողջ մի աշխարհ, որը խոր հոգեկան իրականութիւն է: Բառը աւանդութիւն է:

— Ուստի մեռածութիւն:

— Ուստի կեանք: Միակ կեանքը, որ կարելի է երեւակայել: Բառը, այսինքն՝ դարբերի միջկց եկած իմաստը մեռածութիւն է, դիակ է, երբ մտայնութիւն է: սակայն, նա խոր կեանք է, երբ ոգի է եւ աւանդութիւն:

— Աւանդութի՞ւն...

— Այո՛, աւանդութիւն: Երբ աւանդութիւնը վեր է ածուում որոշ ձեւի, պատկերի եւ սովորութեան, մեքենաբար կրկնուած, նա դառնում է մտայնութիւն, այսինքն՝ արգելք, այսինքն՝ մահ:

— Հենց ես էլ այդ եմ ուզում ասել:

— Սակայն, աւանդութիւնը ձեւ չէ, այլ ոգի: Մի վիճակ, որը տեւական կեանք ունի, ինքն իրեն հաւատարիմ, ամբողջական եւ անվերջանալի: Աւանդութիւնը այն է՝ ինչ որ չի փոխուում ներքնապէս, բայց արտայայտութեան նորանոր ձեւեր է ստեղծում, բայց գոյացման նոր պատկերներ է յորինում, շարժուն է, ներուժ է, կանք է: Եւ աւանդութեան հետ տարօրինակ արկածներ են պատահում: Պատահում է, օրինակի համար, որ մի Դանտէ լսուում է բոլոր սովորութիւնների հետ, տարիներով ծածմուած եւ կրկնուած պատկերների շէնքը վար է նետում, հուժկու բռունցք է զարնում իր դարի մտայնութեան եւ իր երգը կառուցում է անձանօթ «չինուածանիւթերով», ինչպէս ասում են այստեղ: Նրան ոչ ոք չի հասկանում: Ո՞ր մնացին լատինարանների ոճը, սքոլաստիկների նուրբ ու այլեւս անվիճելի դիալեկտիկան, տիրող կրօնքի պարտադրական վարդապետութիւնը, քաղաքական ձգտումների ընդունուած հոսանքը, բանաստեղծական մատչելի ձեւերը ու հազար ուրիշ ազդակներ, որոնք ժամանակի մտայնութիւնն էին կազմում: Դանտէն այդ ամէնը ուրանում էր: Նա թւում էր օտար եւ անհասկանալի:

— Մինչդեռ...

— Մինչդեռ միակն էր, որ փրկեց աւան-

դութիւնը, մարմնացրեց իտալական ոգին եւ անկիւնաքարը դրաւ ապագայ վերածննդեան շրջանին: Եւ նկատեցէք, որ Իտալիան՝ բաժան բաժան եղած Իտալիան՝ առաջին անգամ ապրեց իբրեւ միաւոր, իբրեւ ազգ եւ լեզու: Բարբառները գրեթէ անհետացան: Հոռմը, Ֆիորեցիան, Ռավեննան, Վենետիկը, Միլանօն, Ասիդին եւ հազար ուրիշ վայրեր դարձան ընդհանուր իտալական գործողութեան խորհրդանշանները, մարմին առին, ջահերի պէս վառուեցին, շողկապուեցին եւ այլեւս միացած՝ մասնակցեցին համայն տիեզերական կեանքին:

— Բանաստեղծութիւն է:

— Այո՛, տնտեսագիտութիւն չէ, եւ սակայն, Իտալիան արդիւնք է բանաստեղծութեան. նա դուրս է եկել մեծ մի պոէմայից ու շարունակում է ապրել, որովհետեւ այդ պոէման դեռ գոյութիւն ունի, թէ չէ բաժան բաժան կը լինէր, կը փոշիանար...

— Դա ի՞նչ կաթոլիկ եւ միստիկ տեսակէտներ են...

— Բնադանցական...

— Բառե՛ր... Մարքսիստական տարմուդականութիւնը, միացած միջնադարեան ոքոլաստիկների պատմական դիալեկտիկային, ստեղծել է ամենարտաուոց եւ ամենավերացական աշխարհահայեացքը, պիտի ուսեմ հաւատքը, որ երբեք մարդկութիւնը տեսել է: Պոռտախօս այդ հետադարձութիւնը դունչը խոթել է ցեխի մէջ, աչքերը փակել, սիրտը քողարկել եւ կարծում է, որ մօտեցել է իրականութեան: Մինչդեռ, ինքը իր մէջ, անիրական մի վարդապետութիւն է: Վաճառականական սողոսկուն մի մտայնութիւն, սընանկ՝ իրական իրականութեան առջեւ:

— Ձեզ պէտք էր բանտարկել:

— Եթէ կարծում էք, որ բանտարկելով խնդիրը կը լուծէք՝ բանտարկեցէք: Բայց ահա, առնենք հէնց մեր այս Հայաստանը եւ առնենք տնտեսադիտական, պատմական նիւթապաշտութեան Ձեր չափանիշը եւ չափենք: Այստեղ ոչ մի օրէնք, ընկերաբանական ոչ մի Փորմուլա, մարքսիստական ոչ մի կլիշէ կարող է դիմանալ: Ինչօ՞վ կարող էք բացատրել նրա կազմութիւնը եւ նրա գոյութիւնը. ո՞րն է նրա պատմական զարգացումը. ո՞րպիսի նիւ-